



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL

PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

A.nr.1/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët : Bujar Muzaqi kryesues, Violeta Husaj Rugova dhe Hajriz Hoti, anëtarë, duke vendosur përkitazi me ankesën e Subjektit Politik Partia Liberale Egjiptiane, parashtruar kundër Vendimit Nr.01/1154/2025 datë 24.06.2025 të Komisionit Qendror të Zgjedhjeve, për miratimin e rekomandimit për Emërimin e Anëtareve të Komisioneve Komunal të Zgjedhjeve-KKZ, për Zgjedhjet Lokale, që do të mbahen më 12 Tetor 2025, në seancën e panelit të mbajtur me datë 27.06.2025, merr këtë :

V E N D I M

REFUZOHET E PABAZUAR ankesa Anr.1/2025 datë 26.06.2025, e parashtruar nga Subjekti Politik Partia Liberale e Egjiptiane, me të cilën ka kërkuar që të obligoj Komisionin Qendror të Zgjedhjeve, që të anuloj vendimin nr.01/1154/2025 të datës 24.06.2025, për miratimin e rekomandimit për Emërimin e Anëtareve të Komisioneve Komunal të Zgjedhjeve-KKZ, për Zgjedhjet Lokale, që do të mbahen më 12 Tetor 2025.

A r s y e t i m

Me datë 26.06.2025, PZAP-i, ka pranuar ankesë nga Partia Liberale Egjiptiane, parashtruar kundër Vendimit Nr.01/1154/2025 të datës 24.06.2025, të KQZ, për miratimin e rekomandimit për Emërimin e Anëtareve të Komisioneve Komunal të Zgjedhjeve, për Zgjedhjet Lokale, që do të mbahen më 12 Tetor 2025.

Në ankesë ndër të tjera thuhet se KQZ, me datë 12.06.2024, përmes adresës elektronike i ka bërë ftesë zyrtarit të Subjektit Politik PLE, Driton Xhafa, për nominimin e anëtarëve të Komisioneve Komunale të Zgjedhjeve (KKZ), dhe se Partia Liberale Egjiptiane, brenda afatit të dhënë nga KQZ, ka bërë propozimet e nominimeve për Anëtarë të KKZ-së.

Subjekti Politik PLE, më datë 19/06/2025 ka parashtruar ankesë në Komisioni Qendror të Zgjedhjeve, i cili dokument mban numrin 07/1134/2025, dhe se kjo ankesë nuk është marrë në konsideratë e as në shqyrtim me rastin e nominimeve dhe me rastin e emërimeve të anëtarëve të Komisioneve Komunale të Zgjedhjeve për subjektin e tyre politik.

Sipas parashtruesit të ankesës, për Subjektin Politik Iniciativa e Re Demokratike e Kosovës- (IRDK), KQZ ka nominuar 7 anëtarë nëpër KKZ, ndërsa për Subjektin Politik Partia Liberale Egjiptiane (PLE), vetëm 3 anëtarë në KKZ.

Më tej në ankesë theksohet se Subjekti Politik PLE, ka kërkuar nga KQZ, të ketë përfaqësim edhe në disa komuna tjera, si në: Pejë, Istog, Prizren, Rahovec dhe Deçan, por kjo kërkesë nuk iu është marr parasyshë nga KQZ, edhe pse në procesin e kaluar ka pasur përfaqësim nga ky komunitet në këto komuna.

Sipas parastruesit të ankesës KQZ, nuk ka bërë përfaqësim të drejtë e të barabartë në mes të subjekteve politike të të njëjtit komunitet, kërkon nga PZAP, Anulimin e Vendimit të KQZ-së, Nr.01/1154/2025 të datës 24.06.2025, për miratimin e rekomandimit për Emërimin e Anëtareve të Komisioneve Komunal të Zgjedhjeve-KKZ.

Në ankesë parashtruesi ka bashkangjitur : Ftesën e KQZ-së, për nominimin e Anëtarëve të KQZ-së, Vendimin e KQZ-së, Nr.01/1154/2025 datë 24.06.2025, dhe Ankesën e Subjektit Politik PLE, drejtuar KQZ-së.

Në përgjigjen në ankesë të KQS-së, ndër të tjera thuhet se më datë 11.06.2025 me vendimin nr.01/1106-2025 ka miratuar përbërjen e Komisioneve Komunale të Zgjedhjeve për Zgjedhjet Lokale në Republikën e Kosovës, dhe se ndaj këtij vendimi nuk ka pasur ankesë të parashtruar në PZAP.

KQZ më datë 24.06.2025 me vendim Nr. 01/1154/2025 për miratimin e Rekomandimit për Emërimin e Anëtarëve të KKZ-ve, për Zgjedhjet Lokale 2025, bazuar në vendimin e datës 11.06.2025, vendimi nr. 01/1106-2025, KQZ-së, ka miratuar përbërjen e Komisioneve Komunale të Zgjedhjeve për Zgjedhjet Lokale në Republikën e Kosovës.

Komuniteti Egjiptian është i përfaqësuar në KKZ-të në komunat : Gjakovë, Istog, Klinë, Fushë Kosovë, Mitrovicë e Jugut, Pejë dhe Ferizaj. Për sa i përket përfaqësimit të subjekteve politike tek i njëjti komunitet, nuk është obligative që numri i anëtarëve në KKZ, të jetë i njëjtë për subjektet politike nga komunitetet.

Më tej në përgjigje të KQZ-së, theksohet se edhe subjektet politike nga komuniteti, Serb, Boshnjak, nuk kanë përfaqësim të njëjtë në Komisionet Komunale Zgjedhore. Dy subjektet politike nga komuniteti Serb, njëri subjekt ka përfaqësim në 18 Komisione Komunale të Zgjedhjeve ndërsa subjekti tjetër ka përfaqësim në 14 Komisione Komunale të Zgjedhjeve.

Tri subjektet politike nga komuniteti Boshnjak, njëri subjekt ka përfaqësim në 5 Komisione Komunale të Zgjedhjeve, subjekti i dytë ka përfaqësim në 2 Komisione Komunal Zgjedhore ndërsa subjekti tjetër ka përfaqësim në 1 Komision Komunale të Zgjedhjeve.

KQZ, me vendimin Nr. 01/1154/2025 të datës 24.06.2025, për miratimin e Rekomandimit për Emërimin e Anëtarëve të Komisioneve Komunale të Zgjedhjeve për Zgjedhjet Lokale 2025, nuk ka bërë asnjë shkelje ligjore për sa i përket pretendimeve të palës ankuese.

Përbërje e Komisioneve Komunale të Zgjedhjeve është bërë bazuar në nenin 67 të Ligjit për Zgjedhjet e Përgjithshme Nr. 08/L-228, dhe Rregullores Zgjedhore 02/2024, Emërimi, Përbërja dhe Funksimi i Komisioneve Komunale të Zgjedhjeve.

Formula për emërimin e KKZ-ve është bazuar edhe në këto kritere :

1. Rezultatet e Zgjedhjeve të datës 9 shkurt 2025 në nivel qendror dhe nivel komunal dhe;
2. Të dhënat nga raporti i Agjencisë së Statistikave të Kosovës nga Regjistrimi i Popullsisë 2024.

KQZ, kërkon nga PZAP-i, që të refuzojë ankesën si të pabazuar.

Në përgjigje në ankesë ka bashkangjitur : Vendimin Nr. 01/1106/2025 për miratimin e përbërjes së Komisioneve Komunale, dhe Vendimin Nr. 01/1154-2025 për Emërimin e Anëtarëve të Komisioneve Komunale të Zgjedhjeve.

Paneli, pas shqyrtimit paraprak të ankesës së parashtruar nga ankuesi, gjeti se :

-Ankesa është e pabazuar.

Paneli e vlerësoj lejueshmërinë e ankesës dhe ka ardhur në përfundim se e njëjta i plotëson kushtet e përcaktuara me nenin 69 paragraf 7 të Ligjit për Zgjedhjet e përgjithshme, dhe nenin 4 të Rregullores Nr.01/2024, për Procedurat e parashtrimit dhe vendosjes së ankesave.

Pretendimet ankimore të parashtruesit të ankesës se me rastin e marrjes së vendimit nga KQZ-së, lidhur me mos emërimin e anëtarëve nga radhët e subjektit politik PLE, si anëtar i KKZ-së në Komunitat : Pejë, Istog, Prizren, Rahovec dhe Deçan, nuk qëndrojnë, kjo duke u bazuar edhe në dispozitat ligjore të nenit 67 par. 1, nen par. 1.2 të Ligjit Nr. 08/L – 228 për Zgjedhjet e Përgjithshme, në të cilin nen në mënyrë decitive thuhet se *“nga një (1) anëtarë i nominuar nga subjektet politike që kanë kaluar pragun zgjedhor në zgjedhjet nacionale, nëse i nënshtrohen pragut zgjedhor”*, ndërsa në nenin 67 paragrafi 3 të Ligjit Nr. 08/L – 228 për Zgjedhjet e Përgjithshme, në mënyrë decitive thuhet se *“KQZ-ja duhet të përpiqet ta garantojë përfaqësimin e drejtë në KKZ për të gjitha komunitetet, me numër të dallueshëm të popullatës brenda një komune, duke përfshirë edhe pjesëmarrjen gjinore”*.

Mbi këtë bazë Paneli konstaton se KQZ-ja, me rastin e marrjes së vendimit nr.01/1154/2025 datë 24.06.2025, drejt ka zbatuar dispozitën ligjore të nenit 67 par. 1, nen par. 1.2 dhe par. 3 të Ligjit Nr. 08/L – 228 për Zgjedhjet e Përgjithshme në Republikën e Kosovës, sepse Komuniteti Egjiptian është i përfaqësuar në KKZ-të në komunitat : Gjakovë, Istog, Klinë, Fushë Kosovë, Mitrovicë e Jugut, Pejë dhe Ferizaj. Përbërja e KKZ-ve, është bërë bazuar në nenin 67 të Ligjit Nr. 08/L – 228 për Zgjedhjet e Përgjithshme në Republikën e Kosovës, dhe Rregulloren Zgjedhore 02/2024 Emërimi, Përbërja dhe Funksionimi i Komisioneve Komunale të Zgjedhjeve të KQZ-së, në bazë të Formulës për emërimin e KKZ-ve, si dhe duke u bazuar në kriteret Rezultatet e Zgjedhjeve të datës 9 shkurt 2025 në nivel qendror, dhe nivel komunal dhe të dhënat nga raporti i Agjencisë së Statistikave të Kosovës nga Regjistrimi i Popullsisë 2024, ku në nenin 2 par.1 të Rregullores 02/2024 Emërimi, Përbërja dhe Funksionimi i Komisioneve Komunale të Zgjedhjeve ndër të tjera thuhet se *“...se KQZ vendos në bazë të numrit të banorëve dhe numrit të votave të atij subjekti politik në komunën përkatëse”*.

Ndërsa sa i përket përfaqësimit të subjekteve politike tek i njëjti komunitet, nuk është obligative që numri i anëtarëve në KKZ, të jetë i njëjtë për subjektet politike nga komunitetet.

Duke marrë parasysh të lartëpërmendurat, Paneli vlerëson se parashtruesi i ankesës në mbështetje të pretendimeve të tij, nuk ka ofruar dëshmi të karta dhe bindëse, edhe pse në bazë të nenit 117 paragrafi 3 të LZP-së, barra e të provuarit bie mbi ankuesin, në të cilin nen në mënyrë decitive thuhet se *“Vendosja për ankesat nga PZAP-ja mbështetet në dëshmi të qarta dhe bindëse”*.

Prandaj, duke u mbështetur në nenin 117.3 të Ligjit Nr. 08/L – 228 për Zgjedhjet e Përgjithshme në Republikën e Kosovës, Paneli vlerësoj se pretendimet e tilla të palës ankuese janë të paqëndrueshme dhe si të tilla i refuzoi të pabazuara.

Janë vlerësuar edhe pretendime tjera ankimore të parashtruesit të ankuesit, por paneli nuk ka gjetur se vendimi i atakuar është i përfshirë në ndonjë shkelje, prandaj të gjitha pretendimet janë vlerësuar si të pabazuara.

Prandaj, nga arsyet e parashtruara më lart dhe në pajtim me nenin 13 paragrafi 2 të Rregullores së PZAP-it Nr.01/2024, për Procedurën e Shqyrtimit dhe Vendosjes së Ankesave, si dhe nenit 119 paragrafi 3 të Ligjit Nr. 08/L – 228 për Zgjedhjet e Përgjithshme në Republikën e Kosovës, Paneli vendosi si në dispozitiv të këtij vendimi, duke e refuzuar ankesën si të pabazuar.

PANELI ZGJEDHOR PËR ANKESA DHE PARASHTRESA

A.nr.1/2025 datë 27.06.2025

Kryesues i Panelit,
Bujar Muzaqi



KËSHILLA JURIDIKE : Kundër këtij vendimi është e lejuar ankesa sipas nenit 118 paragrafi 4 të Ligjit Nr. 08/L – 228 për Zgjedhjet e Përgjithshme në Republikën e Kosovës, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimit të këtij vendimi.